



ევროკავშირი
საქართველოსთვის
Project funded by the European Union



გავლენაზე ორიენტირებული ინვესტირება

თანამედროვე მიდგომა სოციალურ გამოწვევებზე საპასუხოდ



ქრისტინა კანელიაკი

პროექტის "თანამშრომლობა დადებითი ცვლილებისთვის" მენეჯერი
სტატიის ავტორი

აღბათ გსმენიათ, რამდენად რთულია დღეს საქართველოში დასაქმება, განსაკუთრებით შეზღუდული შესაძლებლობის მქონე პირებისთვის, მარტოხელა დედებისთვის, ან ყოფილი მსჯავრდებულებისთვის. აღბათ გინახავთ დაცარიელებული სოფლები და მთიანი რეგიონები; შესვედრილხართ ახალგაზრდებს, რომელთაც არ აქვთ ელემენტარული ფორმალური, თუ არაფორმალური განათლების მიღების შესაძლებლობა. იქნებ ბუნებით ტკობა, ან ქალაქის ქუჩებში სეირნობა გიყვართ და მუდმივად გაწუხებთ პლასტიკით, თუ სხვა სახის ნარჩენით დაბინძურებული გარემო... შესაძლოა თქვენს ქალაქსა ან სოფელზე შეყვარებული ადამიანი ხართ და გული გწყდებათ, როცა ხედავთ, როგორ ნადგურდება ჩვენი კულტურული მემკვიდრეობა.

დიახ, პრობლემა ბევრია, მათი მოგვარების გზები და ამ პროცესებში ჩართული ორგანიზაციები მრავალფეროვანი შეიძლება იყოს, თუმცა ამ სტატიაში ერთ განსაკუთრებულ მიდგომაზე გავამახვილებთ ყურადღებას: ეს არის **სოციალურ გავლენაზე ორიენტირებული ინვესტირება (Social Impact Investing)**. ამ მიდგომას, წლების მანძილზე ევროპაში მოიხსენიებდნენ როგორც ვენჩურულ ფილანტროპიას (Venture Philanthropy).

- 1990 ● ვენჩურული ფილანტროპია სათავეს 1990-იან წლებში ამერიკის შეერთებულ შტატებში იღებს. შემდგომ წლებში ეს მიდგომა დიდ ბრიტანეთში განვითარდა, 2002 წლიდან კი კონტინენტურ ევროპაში დაიწყო ფეხის მოკიდება.¹
- 2002 ●
- 2004 ● 2004 წელს შეიქმნა ვენჩურული ფილანტროპიის ევროპული ასოციაცია (EVPA), რომელმაც ხელი შეუწყო სფეროს შესახებ ცოდნის შექმნას, გავრცელებას, გამოცდილების გაზიარებასა და მეტი ადამიანისა თუ ორგანიზაციის დაინტერესებას.

EVPA-ს განმარტებით "ვენჩურული ფილანტროპია" ეს არის მიდგომა, რომლის მიზანია მაღალი სოციალური გავლენის მიღწევა სოციალური მიზნის მქონე ორგანიზაციების ფინანსური და არაფინანსური მხარდაჭერის გზით.² აღსანიშნავია, რომ დღეისათვის ტერმინი "ვენჩურული ფილანტროპია" უკვე მოძველებულად მიიჩნევა. მის მაგივრად მეტად გამოიყენება "სოციალურ გავლენაზე ორიენტირებული ინვესტირება" წინამდებარე და სხვა სტატიებში ამ ორ ტერმინს სინონიმებად გამოვიყენებთ.

¹ John, R., (2006), "Venture Philanthropy: the evolution of high engagement philanthropy in Europe", Skoll Centre for Social Entrepreneurship, Saïd Business School, University of Oxford

² EVPA Knowledge Centre (2018) A Practical Guide to Venture Philanthropy and Social Impact Investment. 4th Edition. EVPA.

ეკონომიკური თანამშრომლობისა და განვითარების ორგანიზაცია (OECD) გვეუბნება, რომ **სოციალურ გავლენაზე ორიენტირებული ინვესტირება გულისხმობს ისეთი ორგანიზაციების ფინანსურ მხარდაჭერას, რომელთა მიზანია, ერთი მხრივ, დადებითი სოციალური და გარემოსდაცვითი ცვლილებების მოხდენა, ხოლო, მეორე მხრივ, გარკვეული ფინანსური მოგების მიღება. შესაბამისად, ინვესტირება სოციალური გავლენისათვის მიზნად ისახავს ეკონომიკური განვითარების ხელშეწყობას, სოციალური შედეგების მიღწევის გზით.**

ამ მიდგომის განხორციელებისთვის აუცილებელია არსებობდეს: გავლენის ინვესტორი (ინდივიდუალური პირი ან კომპანია) და სოციალური მიზნის მქონე ორგანიზაცია, რომელიც ხშირ შემთხვევაში სოციალურ საწარმოს³ წარმოადგენს. **კომპანიებმა შეიძლება თავად ჩადონ სოციალურ საწარმოებში ინვესტირება ან ფინანსები მიმართონ შუამავალ ორგანიზაციებში, ე.წ. გავლენის ფონდებში, რომლებიც იზრუნებენ სოციალური საწარმოების მხარდაჭერაზე სოციალურ გავლენაზე ორიენტირებული ინვესტირების მიდგომებით.**

ვენჩურული ფილანტროპია და სოციალურ გავლენაზე ორიენტირებული ინვესტირება არის მაღალი ჩართულობითა და გრძელვადიანი ხედვით გამორჩეული მიდგომა, რომელიც ქმნის სოციალურ გავლენას სამი სახის პრაქტიკის გამოყენებით. სწორედ ამ პრაქტიკების ერთდროულად და სისტემურად გამოყენება განასხვავებს მათ ტრადიციული ინვესტიციებისგან თუ ფილანტროპიული საქმიანობისგან. ეს პრაქტიკებია⁴:



საჭიროებაზე მორგებული ფინანსური მხარდაჭერა, რაც გულისხმობს სხვადასხვა ფინანსური ინსტრუმენტის გამოყენებას სოციალური საწარმოების განვითარების მხარდასაჭერად, მაგალითად: გრანტი, სესხი, კაპიტალი, ჰიბრიდული ინსტრუმენტები. ფინანსური მხარდაჭერის ინსტრუმენტის შერჩევა ხდება სოციალური საწარმოს საჭიროებებიდან და განვითარების დონიდან გამომდინარე.

ორგანიზაციული განვითარება - ეს გულისხმობს სოციალური საწარმოს არაფინანსურ დახმარებას, ანუ ორგანიზაციულ განვითარებაზე ორიენტირებული მომსახურების მიწოდებას, რომელიც ხელს შეუწყობს საწარმოს ფინანსური მდგრადობის გაუმჯობესებას, სტრუქტურისა და პროცესების დახვეწასა და ადამიანური კაპიტალის გაძლიერებას.



სოციალური გავლენის გაზომვა და მართვა - სოციალური გავლენის მიღწევის, შენარჩუნებისა და გაუმჯობესებისთვის მნიშვნელოვანია მისი გაზომვა და მართვა. სოციალური გავლენის ინვესტორები და ფონდები ასწავლიან და ეხმარებიან სოციალურ საწარმოებს გავლენის გაზომვასა და მართვაში, რადგან სწორედ ეს ინფორმაცია აჩვენებს ინვესტორს მიაღწია თუ არა მან თავდაპირველ მიზანს.

შეჯამებისთვის უნდა აღინიშნოს, რომ სოციალურ გავლენაზე ორიენტირებული ინვესტირება გრძელვადიანი პროცესია. ინვესტორები სოციალურ საწარმოებთან სამი, ხუთი, შვიდი წლის მანძილზეც კი მუშაობენ ხოლმე. ამავდროულად, ეს პროცესი მოითხოვს ორივე მხარის აქტიურ ჩართულობას.

³ სოციალური საწარმოს განმარტება იხილეთ აქ: <http://segeorgia.org/info.php?ID=70>

⁴ EVPA Knowledge Centre (2018) A Practical Guide to Venture Philanthropy and Social Impact Investment. 4th Edition. EVPA

სოციალური გავლენის მქონე ინვესტირების წარმატებული მაგალითები ინგლისურ ენაზე შეგიძლიათ იხილოთ აქ: <https://stories.evpa.eu.com/>

ეს სტატია შექმნილია ევროკავშირის მხარდაჭერით მიმდინარე პროექტის "თანამშრომლობა დადებითი ცვლილებისთვის - სოციალური მეწარმეობისა და სოციალური ინვესტიციების განვითარება ეკონომიკური და სოციალური გაძლიერებისთვის აღმსავლეთ პარტნიორობის ქვეყნებსა და რუსეთში" ფარგლებში, რომელსაც საქართველოს სტრატეგიული კვლევებისა და განვითარების ცენტრი (CSRDC) ვენჩურული ფილანტროპიის ევროპულ ასოციაციასთან (EVPA) თანამშრომლობით ახორციელებს. მის შინაარსზე სრულად პასუხისმგებელია CSRDC და შესაძლოა, რომ ის არ გამოხატავდეს ევროკავშირის შეხედულებებს.